

御纂醫宗金鑑卷四十八

編輯婦科心法要訣

驚悸恍惚證治

茯神散

加味歸脾湯

產後血虛心氣弱驚悸恍惚不安寧養心須用茯
神散參耆地芍桂茯神琥珀龍齒歸牛膝憂思歸
脾砂齒靈

註

產後血虛心氣不守神志怯弱故令驚悸恍

惚不寧也宜用茯神散其方乃人參黃耆熟地白芍桂心茯神琥珀龍齒當歸牛膝也若因憂愁思慮傷心脾者宜歸脾湯加硃砂龍齒治之

歸脾湯

方見首卷

妄言見鬼發狂證治

妙香散

產後譫狂見鬼神敗血冲心小調經心虛悶亂妙香散二茯參耆遠志辰甘桂木麝山藥末歸地煎

調效若神

註

產後敗血冲心狂亂見鬼譫言妄語者宜服
小調經散若因心血虛神不守舍而悶亂者
則用妙香散卽扶苓茯神人參黃耆遠志辰
砂甘草桔梗木香麝香山藥爲散以當歸熟
地煎湯調服卽愈其效如神

虛煩證治

人參當歸湯

產後血虛煩短氣人參當歸湯最良參麥歸芍熟

地桂瘀血衝心失笑方去血過多煩躁甚須用當歸補血湯

註

產後血虛心煩短氣者宜人參當歸湯卽人參麥冬當歸白芍熟地肉桂也若因敗血冲心者宜服失笑散若去血過多煩而躁者乃亡血證也宜當歸補血湯

當歸補血湯

失笑散

方俱見首卷

發渴證治

參麥飲

加味四物湯

竹葉歸耆湯

氣虛津短參麥飲血虛四物粉麥煎渴甚竹葉歸耆效參朮歸耆竹葉甘

註

產後氣虛津液不足而渴者宜參麥飲卽人參麥冬五味子也血虛而渴者宜四物湯加花粉麥冬若渴甚不解者用竹葉歸耆湯其方乃人參白朮當歸黃耆竹葉甘草煎服也

四物湯

方見首卷

欬嗽證治

旋覆花湯

麥味地黃湯

加味佛手散

產後欬嗽感風寒旋覆花湯荆穗前麻杏半苓赤

芍藥五味甘草棗薑煎虛火上炎冲肺嗽麥味六

黃滋化源瘀血入肺佛手散加入桃紅杏貝延

註

產後欬嗽若因起動太蚤感冒風寒者用旋

覆花湯卽荆芥穗前胡麻黃杏仁半夏茯苓
赤芍藥五味子甘草旋覆棗薑也若因陰虛
火炎上爍肺金而嗽者宜六味地黃加麥冬
五味子名麥味地黃湯滋其化源若因瘀血
上冲入肺而嗽者宜佛手散加桃仁紅花杏
仁川貝母延胡索以破其瘀其嗽自愈

六味地黃湯

佛手散

方俱見首卷

衄血證治

人參澤蘭葉湯

產後口鼻黑而衄胃絕肺敗藥難醫參蘭丹膝生
熟地童便多冲冀萬一

註

產後惡露不下虛火載血上行溢出鼻竅不
循經脈變黑色見於口鼻爲熱極反兼水化
故曰胃絕肺敗藥難醫也或用人參澤蘭葉
湯卽人參澤蘭葉丹皮牛膝生地熟地煎湯
多冲童便飲之間有得生者然亦希冀於萬
一者耳

痢證總括

產後痢名產子痢飲食生冷暑寒干裏急後重有餘病日久滑脫不足者赤黃稠黏多是熱清澈鴨溏定屬寒寒熱溫清調補澁虛實新久要詳叅

註

產後痢者名產子痢多因飲食不調貪食生冷或起居不慎衝寒受暑所致若腹中疴痛裏急後重者屬有餘之證若日久虛寒滑脫者屬不足之證痢色黃赤稠黏多屬於熱清稀澄澈如鴨糞者則屬於寒治之之法熱者

清之寒者溫之冷熱不和者調之虛者補之
實者瀉之虛實新久之間宜細心詳參也

痢疾證治

槐連四物湯

芍藥湯

真人養藏湯

熱痢槐連四物效冷熱有餘芍藥湯芍藥苓連歸
木草枳桂墜枳痛大黃虛寒滑脫參朮桂芍藥訶
蔻廣木香甘草粟殼名養藏日久十全大補良

註

熱者清之故熱痢宜槐連四物湯卽四物湯
加槐花黃連以清熱而堅腸也冷熱不和者
調之故宜芍藥湯卽白芍藥黃芩黃連當歸
木香甘草肉桂枳榔墜者倍加枳榔痛加生
大黃也若虛寒滑脫則宜溫補而固澁之宜
真人養藏湯卽人參白朮白芍藥肉桂肉豆
蔻訶子木香甘草罌粟殼同煎服也若日久
不止氣血大虛宜十全大補湯補之

四物湯

十全大補湯

方俱見首卷

人參敗毒散

香連丸

加味四物湯

有表痢用敗毒散羌獨枳梗共柴前參苓芍草薑
葱引暑濕成痢用香連血滲大腸成血痢四物膠
榆餘鰓添

註

外感風寒成痢者宜人參敗毒散卽羌活獨

活枳殼桔梗柴胡前胡人參茯苓川芎甘草

薑蔥引也若因暑濕致痢宜香連丸卽黃連
木香爲丸也若敗血滲入大腸成血痢者宜
四物加阿膠地榆血餘烏鰂魚骨服之

四物湯

方見首卷

瘧疾

加味生化湯

加味二陳湯

藿香正氣湯

產後瘧多因瘀血榮衛不和熱又寒生化湯中加

柴甲痰食二陳查朴添外感不正正氣散陳半苓
木蘇朴甘腹皮桔梗藿香芷引加薑棗一同煎

註

產後患瘧多因瘀血停留榮衛不和故寒熱
往來也宜用生化湯加柴胡鱉甲服之若因
痰飲食積者宜二陳湯加山查厚朴若果外
感風寒方可用藿香正氣散治之其方卽陳
皮半夏茯苓白朮蘇葉厚朴甘草大腹皮桔
梗藿香白芷也

二陳湯

方見三卷

蓐勞虛羸總括

產後失調氣血弱風寒外客內停瘀飲食過傷兼
勞怒不足之中挾有餘寒熱往來臍腹痛懶食多
眠頭暈迷骨蒸盜汗痰嗽喘面黃肌瘦力難支蓐
勞先須調脾胃後調榮衛補其虛

註

產後氣血兩虛起居不慎風寒外襲瘀血內
停更或飲食厚味過傷憂勞忿怒乃不足之
中挾有餘之證致生寒熱往來臍腹痛懶
進飲食喜眠卧起則頭暈昏迷骨蒸潮熱盜

汗自汗痰喘咳嗽面色萎黃肌肉削瘦氣力
難支名爲蓐勞醫治甚難凡欲療斯疾者必
當先調理其脾胃使飲食強健能勝藥力然
後調其榮衛補其虛損始能痊愈

蓐勞虛羸證治

三合散

扶脾益胃六君子穀化精微氣血強能食漸覺精
神爽調衛和榮三合良八珍去朮小柴共隨證加
減效非常病退虛羸補氣血八珍十補養榮方

註

產後蓐勞治法當先扶脾益胃宜六君子湯
加減用之使脾胃強壯能食能消則後天水
穀之氣化生精微氣血自然壯盛精神自然
漸爽然後調其衛氣和其榮血宜三合散卽
八珍湯去白朮加小柴胡湯乃人參柴胡黃
芩半夏甘草也隨證加減治之如寒熱往來
臍腹脹痛則去人參黃芩生地加延胡桃仁
如懶食喜睡頭眩則去柴胡加黃耆縮砂陳
皮如骨蒸盜汗自汗則去川芎柴胡加鱉甲